

Leich Predig /

Welche bey der Begräbnuß

Weiland deß Durch-

leuchtigsten / Hochgebornen Fürsten

vnd Herren / Herren Johannis Casimiri / Pfaltz-

graffen bey Rhein / Vormunden / vnd der Churfürst-

lichen Pfaltz Administratoris / Herzhogen in

Bayern 28. Christtligster gedächtnuß /

ist gehalten worden / den 26.

Ianuarij Anno 92.

Durch

MELCHIOREM ANGERYM HoffPredigern.

*Sapient. 4. vers. 13. 14.*

Er ist bald vollkommen worden vnd hat viel jaber erfüllet. Dann seine Seele  
gefällt Gott / Darumb eyler er mit ihm auß dem bösen leben.



Gedruckt in der Churfürstlichen Statt Heidelberg /

durch Abraham Smesman / in Verlegung

Josua Harnisch / Anno 1592.

**E**  
vni  
gen  
Ho  
Ca  
der  
Da  
vni  
vni  
ge  
nem  
vnd  
**S**  
lofe  
trüb  
vnd  
ten  
dad  
nem  
ren  
von  
Da  
fies  
wah  
Dn  
n E

**G**eliebte in dem **HERREN** Jesu  
 Christo/ Wir haben seunder nach dem  
 vnmandelbaren / gerechten / vnd guten willen des ewi-  
 gen vnd Allmächtigen Gottes/ Des Durchleuchtigsten  
 Hochgebornen Fürsten vnd Herren/ Herren Johannis  
 Casimiri/ Pfalzgraffen bey Rhein/ Vormunden/ vnd  
 der Churfürstl. Pfalz Administratoris/ Herzogen in  
 Bayern. vnsers Gnädigsten Herren/ abgelegte hütte/  
 vnd Fürstliche Leiche auß Christlichem / schuldigem/  
 vnd vnderthänigstem gehorsam / nicht ohne herliche  
 große sorge/ betrübnuß vnd trawrigkeit/ allhero / zu sei-  
 nem Schlasskammerlein / vnd Ruhbettem / gebracht  
 vnd geleget.

Damit wir aber nicht nach dem Exempel der Gotte-  
 losen vnd sichern Welt/ die en schme-lichen / hochbes-  
 trüben/ vnd sehr beschwerlichen fall/ obenhin anschawen/  
 vnd als ob er vngefahr geschehen / vnd nichts zu bedeus-  
 ten hette/ achten vnd halten: Sondern / was vns Gott  
 dadurch für augen stellen/ vnd zuerkennen geben/ war-  
 nemen vnd zu gemüth führen mögen/ Auch nicht traw-  
 ren/ wie die Heyden: So laß vns Gottes Wort das  
 von hören/ bey ihm trost suchen/ Vnd zu forderst / den  
 Vatter all: vnd Barmhertzigkeit / vnd den Gott alles tro-  
 stes anruffen/ daß er durch sein heiliges Wort vñ Geist/  
 wahren Trost/ in unseren betrübten hertzen wolle wirket:  
 Vnd sprechen miteinander das Gebet/ das vns der Her-  
 re Christus selber get. hret hat:

Vnser Vatter./r.

A 2

Textus.

Textus. Iesaiæ 57. v. 1, 2.

Der gerechte kompt vmb / vnd niemand ist der es zu hertzen nemme. Vnd heilige Leuthe werden auffgeraffet / vnd niemand achtet darauff. Dann die gerechten werden weggerafft vor dem vnglück / vnd die richtig für ihm gewandelt haben / kommen zu friede / vnd ruhen in ihren kammern.

**W**ann wir bedencen / was es für eine gelegenheit hat / nicht allein mit dem Römischen Reich / welches ohne das auff schwachen Leimenen zähen stehet / sonder mit der ganzen Christenheit / Wie geschwinde / schwere / vnd gefehrliche zeiten vorhanden seynd / Wie die grundveste beben / Wie alles in der ganzen weiten Welt frachtet / vnd zum vndergang sich neiget / Wie der Teuffel / der von Banden loß / weil er mercket / daß die zeit zum Gericht kurz ist / so greulich tobet vnd wüthet / Daß es sich auch ansehen laßt / als were es vmb die kleine Herde des Herren / vmb das Wärmlein Jacob / vnd den armen hauffen Israel geschehen: So mögen wir ja alle mit einander / hohes vnd niedriges standes / mit dem Propheten Jeremia wol sagen vnd klagen: Ach daß wir Wasser genug hetten in vnserem haupt / vnd vnser augen ihre quellen weren / Tag vnd Nacht zu wey-

nen /

Jerem. 9.



gen/ vber den jammer des Landes/ vnd vber den schaden  
Josephs.

Wen wolte es nicht jammern? Wen wolte es nicht zu  
herten gehen? Wer wolte nicht von herten betrübt vnd  
bekümmert sein? Wann man betrachtet/ Daß vnser  
Helden/ die mächtigen Seulen der Kirchen vnnnd des  
Vatterlands/ Die Pflegväter vnd Zeugammen des  
Volckes Gottes/ Die starken Pfeiler/ so vom Her-  
ren gesetzt/ vnd die wieder den Riß gestanden/ also fal-  
len/ ombgerissen/ vnd hinweggerafft werden.

Wem wolte sein hert für fürchten nicht zittern vnnnd  
beben/ wann er bedencken/ vnnnd auß Gottes Wort sich  
erinnern wird/ daß dieser schmerckliche vnd hochbeschwer-  
liche fall/ der tödliche abgang vnser gndigsten Für-  
sten vnd Herren/ nicht allein an ihm selbst sehr kläglich/  
sondern eine anzeigung vnd schreckliche dröwung ist/ vie-  
les vnd grosses jammers vnd vnglücks/ das gewiß/ vnd  
endlich/ wo wir nicht durch ein Gottseliges vnd Bus-  
fertiges leben/ vnserem lieben Himmelischen Vatter in  
die Rute fallen/ vns treffen vnd ergreifen wird. Dann  
gleich wie es ein zeichē besonderer gnad vñ wolthat/ Gott-  
licher barmhertzigkeit ist/ wann vns von Gott/ Gottseli-  
ge Regenten vnd Herrschafften gegeben werden: Also ist  
es im widerspiel ein anzeig: fürstehender straff/ vnnnd  
schweres Zorns Gottes/ wann er vns solche Haupt-  
wiedervmb auß den augen hinwegnimbt/ vnd beschwer-  
liche andernung für gehen lästet.

Dann/ Brüllet auch ein Löw im Walde/ wann er  
keinen raub hat? Bläset man auch die Posaunen in Amos 3.  
einer Statt/ daß sich das Volck dafür nicht entfere?  
Ist auch ein vnglück in der Statt/ das der Herr nicht  
thut? Der Löw brüllet/ wer solte sich nicht fürchten? Der  
Herr

Herz redet/ wer solt nicht weißsagen/ vnnnd den Zorn des  
HERRN verkündigen?

Diemeil wir aber Christen seyn/ wiedergeboren zu ei-  
ner lebendigen hoffnung/ so sollen wir nicht trawren/ wie  
die/ so keine hoffnung haben/ Sondern auß dem Wort  
Gottes/ das allein vnser trost ist in der bösen zeit/ vnder-  
richt vnd trost suchen/ Im geraumen vmbkeren/ vnd den  
Herzen vnseren Gott/ sampt seiner gnad vnd hülff/ weil  
er noch zu finden ist/ suchen/ Das nicht all das vnglück  
das vns der Herr dröwet/ vber vns komme/ vnseres sein-  
de vber vns erfrewet/ vnnnd vnserer widersacher Horn  
erhöhet werde. Darvmb/ so laß vns auß verlesenem  
Text diese zween Puncten mit einander bedencken vnd  
erwegen.

- I. Erstlich/ warvmb wir in diesem kläglichen vnd hoch-  
betrübtten fall/ trawren vnnnd klagen sollen: Vnd wie dem  
künfftigen vnglück/ das vns der Herr dadurch für die  
augen stellet/ zu begegnen seyn.
- II. Weß wir vns auch in diesem fall zu trösten haben.

### Vom Ersten.

Wir elenden Menschen seynd gemeiniglich also ge-  
schaffen/ daß wann vns Gott straffet vnd schläget/ wir  
allein auff die Wunden oder den Stein/ damit wir ge-  
troffen seynd/ sehen/ viel davon wissen zu sagen vnd zu  
klagen: Mercken aber nicht auff die hand dessen/ der  
den streich oder wurff geführet hat/ noch auff die vrsachen  
vmb deren willen solche straffen vber vns kommen/ vnd  
der Zorn des Allmächtigen vber vns aufgeschüttet wirdt.

Darvmb klaget allhie der Geist Gottes/ durch den  
Propheten Jesaiam/ vnnnd anderswo in der Schrift/  
vber solche grosse blindheit/ vnachtsamkeit/ vnd sicher-  
heit

heit der Menschen / daß sie so gar nicht achten auff die  
werck des Herren / auff seine wunderbare fürsichung / vnd  
regierung der Welt / betrachten auch nicht auß Gottes  
Wort / Warumb dieses oder jenes also geschehe.

Zwar / weil das gericht vom hausse des Herren an-  
setzt / das ist frommer Gottseliger Leuth / ja auch hoher  
vnd Christlicher Potentaten nicht verschonet wird:  
Sollen sie billich ihnen die rechnung machen / Wie der  
Apostel Petrus lehret / Was wirdt es mit den Gottlosen <sup>1. Pet. 4.</sup>  
für ein end nehmen? Vnd wie jener sagt: Quid faciet  
humilis herba deserti, Si stare non valet alta ce-  
drus Libani? Was soll das kleine staudlein thun / da  
auch die großen Baume außgerissen werden / vnd vorm  
windt nicht sicher seynd. Dann der Herr raffet die gerech-  
ten hinweg / spricht Jesaias / Daß sie das künfftige vn-  
glück / damit er gedendet die Gottlose Welt zu plagen /  
nicht sehen. Aber sie wollen nicht achten auff das thun <sup>Psal. 28.</sup>  
des Herren / noch auff die werck seiner hände. Der Herr /  
der ein rechter richter ist / der dröwet zwar alle tage: Wer <sup>Psal. 7.</sup>  
aber mercket es? Vnd wer lest ihm solche drawung zu  
hertzen gehen? Wer glaubet es / daß der Herr so sehr zür-  
net / vnd wer fürchtet sich für solchem seinem grimm?  
<sup>Psal. 90.</sup>

Darumb / Geliebte in den Herren / Sollen wir in  
diesem trawrigen vnd hoch beschwerlichen fall / den wir  
vor augen haben / nit alleine sehen auff den Riß / den der  
Herr im Lande gethan / sondern auff den Zorn des Her-  
ren / vnd auff vnser große Sünde / die solches verursa-  
chet haben.

Dann allhie sagt der Prophet Jesaias / Daß / wann  
Gott vber ein ganges Land seinen grimmigen Zorn wolle  
ambrennen lassen / vnd das Gottlose wesen vnd leben der  
Welt / mit grosser straffe heimsuchen / So rafft er die ge-  
rechten

Proy. 28.

rechten vnd Gottesfurchtigen / sonderliche Gottseligen / fromme vnd Christliche Regenten / die seinen Zorn mit ihrem Gebet auffhalten / vhrplötzlich hinweg / daß sie solchs vnglück nicht sehen: Die sorglose vnd sichere Leute aber damit vnversehens überfallen vnd getroffen werden. Vnd eben dasselbe bezeuget auch der weise König Salomon in seinen Sprüchen / 28. Cap. Vñ des Landes Sünden willen / werden viel anderunge der Fürstenthümen. Item im Buch der Weißheit 4. Cap. ver. 17. 18. 19. Wie dann auch solches / durch die Tägliche erfahrung vnd exempla / mehr als zu viel am tag vnd vor augen ist.

Dann als der fromme vnd Gottseliche König Josaphat lebete vnd regiert / stunde es wol in dem Königreich Juda. Was aber für anderung / jammer vnd elend / beyde in dem Weltlichen Regiment / vnd auch in der Religion / vñnd was für grosse straffen auff seinen Todt ersolget seynd / Vnd solches vmb des Volcks Sündewillen / welches sein hertz nicht hatte geschickt zu dem Gott ihrer Vätter / ist auß den Historien Göttliches Wortes 2. Pat. 33. 2. Pat. 21. klar vnd offenbar.

Weil Hiskias regiert / war ein zimlicher wolstand bey dem Volck Gottes. Als er aber seyn augen zuhete / hilff lieber Gott / welch ein schrecklicher jammer / wie 2. Reg. 21. grewliche Abgötterey / wie grosses vnglück ist auff solchen Todt erfolget? 2. Pat. 33.

Dem Gottseligen König Josia leßte Gott anzeigem Weil dein hertz erweicht ist vber den worten / die du gehöret hast / vnd hast dich gedemütiget für dem Herren: 2. Reg. 22. So will ich dich zu deinen Vätern sammeln / daß du mit freuden in dein Grab versamlet werdest / vñnd deine augen nicht sehen alles das vnglück / das ich auff diese Statt senden werde.

Wie es

Wie es zu anderen zeiten ergangen / wann Gott  
Christliche vnd Gottselige Regenten / die Pfleger vnnnd  
Erzammen der Kirchen gewesen / gegeben hat / vnnnd  
aber von wegen des vndancks / vnnnd der Sünden des  
Volcks / dieselben auffgeraffet / hinweg genommen / vnd  
ihnen wieder enzogen / Davon mag man in der Kirchen  
Histori lesen / wie es nach dem Tode des Kayfers Con-  
stantini Magni, Theodosij, Honorij, vñ anderer ergan-  
gen sey. Denn alles hie zu erzehlen / viel zu lang würde.

Was zu vnseren zeiten sich zugetragen / vnd täglich  
begibt / ist am Tage / vnd darff keiner beweisung / Son-  
der / es soll vns die Tägliche erfahrung die augen auff-  
thun daß wir der wercke des Herren lehren besser ach-  
ten / vnd warnemmen.

Daß ob schon die ruchlose vnd sichere Welt / die hand  
Gottes / vnd seine werck / in dem Tod der gerechten nicht  
erkennen noch mercken will: So leß doch Gott in dem  
selbigen seine ewige Fürsichung / vnd wunderbarliche Re-  
gierung also sehen / daß / wer nicht mutwillig blind seyn  
wil / die grossen werck Gottes nicht allein sehen / sondern  
auch gleichsam greiffen vnd fühlen muß.

Dann ist nicht das ein sonderbares werck Gottes / daß  
gleich wie ein embsiger vnd fleissiger Bawman / den gu-  
ten Weizen / zur zeit der Erndte / in einer eyle / vor dem  
Regen vnd vngewitter auffraffet / vnd an einen sichern  
orth in seine Scheuren sammet / vnd verbirget: Also  
der getrewe vnd Barmhertzige Gott / seine liebe kinder /  
vnnnd getrewe Diener / als herrliche garben des guten  
Weizen / für dem schrecklichen wetter seines grimmigen  
Zorns / auch auffraffet von der Erden / vnd in die himf-  
liche Scheuren / da sie für allem vnglück sicher seynd /  
sammet vnd verbirget?

Ist das nicht Gottes werck / vnd eine anzeigung seiner grossen gütē / barmherzigkeit vnd langmütigkeit / daß er vns durch solchen tod frohner vnd heiliger leuthe / sonderslich Christlicher / Gottseliger vnd trewer Regenten / warnet für vnserem schaden / vns zur Buß locket / vnd gleichsam den weg zeiget / dem künfftigen vnglück zu entgehen?

Deß wegen / Geliebte in dem Herzen / sollen wir bey dem tödlichen abgang / deß Durchleuchtigsten / hochgebornen Fürsten vnd Herrn / Herrn Johannis Casimirs / Pfalzgraffen ꝛc. vnsers gnädigsten Herren / nicht allein sehen auff Natürliche vrsachen / Sondern vns erinnern vnserer Sünden / damit wir solchen schaden / vnnnd das künfftige vnglück / das vns der Herr dadurch dröwet / verorsachet haben: Vnd deß wegen vns zu ihm befehlen / auff daß er sich auch wieder zu vns kere / vnd von vns abwende das böse / das er vber vns / wo wir vns nicht bessern / gedacht vnd beschlossen hat.

Dann niemand so ein steinern hertz haben kann / daß er nicht sollte erkennen / vnd mercken / daß Gott grosse Leidsstraffen vber vns zu führen bedacht sey / Wann er die grossen wolthaten / vnd gnade / so vns Gott in diesem vnserem gnädigsten Herzen erzeiget vnd gegeben hat / Vnd hergegen auch den grossen vndanck / vnnnd vbermachte sicherheit / gegen eynander halten / vnd vergleichen wirdt.

Dann erstlich ist durch die ganze Welt bekant / vnnnd gerühmet / auch jedermenniglichem bewust / daß S. J. G. ein Gottliebender vnd Christlicher Fürst vnd Regent gewesen / der ihm nichts mehr / biß an sein seliges end / hat lassen angelegen sein / als den gemeinen nuzen / vnd befürderung der Christlichen Kirchen vnd deß reichs Gottes / Daß man mit dem heiligen Ambrosio wol von ihm sagen kann / Dilexi virum, qui cum corpore solueretur,

magis



magis de statu Ecclesiarum, quàm de suis periculis  
angebatur.

Es haben aber S. F. G. ihre Religion vnd glaubens  
bestandnuß/ nicht gelernet auß Menschen Schriffteñ/  
oder gegründet auff auctoritet vnd ansehen der Lehrer/  
Sondern auff den vnfehlbaren vnd beständigen grund/  
außer welchem kein ander kann geleget werden/ nemlich  
auff Jesum Christum/ wie der von den Propheten vnd  
Aposteln ist geprediget worden.

Vnd ist S. F. G. solches ihres glaubens vnnnd Reli-  
gion/ob wol dieselbe in der welt verhasset/ vnnnd von vie-  
len verlästert/ verlesert/ vnnnd vffs aller schändlichste ist  
aufgeschrien worden/dermassen versichert/vnd in ihrem  
herzen also gewiß gewesen/ daß S. F. G. sich nicht ge-  
schewet/ nicht allein dieselbige öffentlich vor der ganzen  
Christenheit zu bekennen/ Sondern auch anno 66. auff  
dem Reichstag zu Augspurg/ da S. G. geliebster  
Herr Vatter/ Churfürst Fridrich/ Christeligster ge-  
decktenuß/der selben Confession halben/beschwerlich an-  
geklagt worden/ Die Bibel/ vnd Augspürgische Con-  
fession, den anwesenden Chur vnd Fürsten/ auch der ab-  
wesenden Botschafften vñ Gesandte/in der Person/mit  
vnerschrockenem gemüt/vñ auffrätzigem herze/ fürge-  
legt/vnd neben ihrem geliebsten Herrn Vatter/ begeret/  
eines andern vnd bessern/ auß Gottes wort/ vnderichtet  
vnd vberzeuget zu werden/ Aber niemands vnter allen  
anwesenden Churfürsten vñ Ständen herfür getreten/  
der auch das wenigste vnd geringste für zu bringen oder  
eynzuwenden gehabt.

Welches denn S. F. G. dermassen in ihrem herzen  
confirmiret vnnnd gestercket/ daß dieselbe nachgehends/  
nicht allein mit herzen vnnnd mund solches öffentlich be-



kennet/ sondern auch neben andern/ hohes vnd Adeltiches standes/vnd anderen Gottliebenden Personen/ vnd redlichen leuthen/mit darsetzung ihres leibes vnd Blutes/in dem sie sich der armen bedrangten glieder des Herren Christi/ so vmb solcher Religion willen verfolgt wurden/angenossien/ihnen zu hülff vnd trost kommen/ zum vierdten mahl vor der ganzen welt dargethan vnd bezeuget haben.

Wie hergliche liebe vnd grosses verlangen S. J. G. zu dem heiligen wort Gottes/ ihr ganzes lebenlang getragen/ist nicht allein denen/die stets vñ seine Fürstliche Gnade gewesen/sondern auch andern vnd dieser Christlichen gemeinde/ also bekandt/das es zeugnuß vnd beweisung nicht von nöhten hat.

Mit was freuden vnd herglichem trost S. J. G. das heilige Abendmahl des Herren Christi/ als einen hohen vnd teweren Schatz/ so offtes die gelegenheit gegeten/ mit der Christlichen gemeinde gebrauchet/ Davon können viel frommer herren zeugen.

S. J. G. haben mit dem Christlichen Gebet/ ganz fleissig vñ vnnachlässig angehalten/ Diemeil dieselbigen in Schola crucis, zimlich von Gott dem Herren seynd geübet vñnd Probiret worden/ auch wol gesehen/ mit dem frommen König Josaphat/ Das kein hülff sey/ denn bey dem Herren alleine.

Es ist aber S. J. G. nicht allein für ihre Person Gottesfürchtig vñnd Gottselig gewesen/ sondern haben auch/so bald sie in ihr Regiment getretten/ diß fürnehmlich ihre höchste vnd größte sorge sein lassen/ Das die Religion reyn vnd vnverfälscht/ wie sie S. J. G. auß dem Brünlein Israels geschöpffet/möchte erhalten/vnd allen Vnderthanen in ihrer Gnade landen/fürgetragen vñ geprediget

bediget werden / damit sie auß dem wort Gottes recht vnderrichtet / vnnnd zu der erkandnuß Gottes / vnd der ewigen seligkeit möchten gebracht werden.

Vnd daran haben ihre Gnade nichts lassen erwinden / seine mühe / keine arbeit / kein kosten gesparet / damit Kirchen vnd Schulen recht vnd wol bestellet würden.

Sonderlich / da seine F. G. durch schickung des allmächtigen Gottes / zur Administration der Ehurf. Pf. beruffen worden / haben sie mit viel vñ grosser sorg / mühe vnd angst dahin gearbeitet / daß Kirchen vnd Schulen / so durch etliche vnruhige Theologen, mit vngesunder lehre von der Person Christi / vnnnd den heiligen Sacramenten turbiret / wiederum zu recht gebracht / vnd mit reinen Lehrern bestellet vnd versehen würden. Welches auch S. F. G. durch Gottes gnädige hülffe zwar glücklich ins werck gerichtet / Es aber dabey nicht haben bescheiden lassen / Sondern / damit sie ja zu der vnderthanen heil vnd wolffart / nichts an sich erwinden ließen / seynd sie denselbē nicht allein mit gutem exempel / in vleissigem besuchen der Predigten des Göttlichen worts / vnnnd gebrauch des heiligen Abendmals / füraangen / Sondern haben auch endlich ein General Visitation, nach dem Exempel des löblichen vnnnd Gottseligen Königes Josaphats / anstellen lassen / deren auch S. F. G. so viel die hochwichtige vnd vielfaltige geschäfte haben leiden können / in der Person bezeugen / vnd die vnderthanen mit aller sanfftemut vnnnd Christlicher bescheidenheit / in gemein / vnd in sonderheit / auß Gottes wort vnderrichten / vnd ihnen den weg zur ewigen seligkeit zeigen lassen : welches auch nicht ohne große frucht / vnd ohne besondere herrliche freude ihrer F. G. abgangen.

Was wir aber für einen trewen Vatter des Vatters

lands an E. F. G. gehabt/wie er des Lands vnd seiner armen vnderthanen bestes allzeit gesucht vnd gefordert/das erkennen vnd wissen fromme hertzen: Die andern aber/so mutwillig verstockt seynd/vnd Gottes güte wenig achten/werdens zu seiner zeit erkennen/beweynen/ vnnnd mit ihrem selbst eygenen schaden beklagen.

Er war der schöne baum / darunter wir Gericht vnd gerechtigkeit / schus vnnnd schirm / friede / vnnnd gerühiges stilles leben hatten. Wie viel betrübter hertzen der Heiligen haben seine F. G. erquicket? Sie haben die arme verstoffene glieder Christi / in ihrem elende auffgenommen vnnnd beherberget / vnd hat sich keiner jemals/der von wegen der warheit des Euangelij ist bedrängt gewesen / Seiner F. G. erzeiget / der ohne hülff / rath oder trost/von E. F. G. wer gelassen worden/ja de. auch nicht auß dem lieblichen vnd gnädigen anblick E. F. G. besonderen trost vnd erquickung empfangen hette.

Vnd weil seine F. G. allezeit den Herrn für augen gehabt/ vñ ihn gesucht von ganzem hertzen/ohn allen falsch vnd heuchelei (ob sie gleich auch als ein Mensch/ihre gebrechen gehabt) So ist auch/wie vom Josaphat geschriben stehet/der Herr bey vnd mit ihm gewesen/das ihn alle fromme hertzen geliebet / freunde vnd feinde geehret / die widersacher gefürchtet/ vnd ist ein sonderer schrecken vñ furcht gewesen dem AntiChristischen hauffen / auch bis in sein lestes vnd seliges ende.

Als aber der liebe allmächtige Gott / nach seinem gutten vnd Väterlichen willen/ E. F. G. mit etwas leibes schwachheit angegriffen/haben sie bey zeit sich zu einem seligen abscheid vnd sterbstündlein gefast vnd geschickt gemacht / Diu weil E. F. G. nicht allein gesehen/das ihre leibes kräftten allgemach abneimen/ vnd es mit ihre sich

zum ende nähert: sondern auch/dieweil ihre Gnaden höchlich verlanget vnd geseuffhet nach dem ewigen Vatterland/ als die da müde waren/ nicht allein ihrer selbst eigener zugestandener vielfaltiger widerwertigkeit/ sondern auch des gemeinen jammers vnd elendes dieses zergänglichlichen vnd betrübten lebens/ darinnen der liebe Gott/ E. J. G. als das gold im offen/ vielfältig Probiret/ vnd ihren glauben köstlicher als das feine Gold erfunden. Derowegen vmb so viel desto mehr/ mit vleissiger anhöhrung Göttlichen worts/ mit betrachtung desselben/ mit Gottseligen Christlichen Gesprechen/auch mit dem brauch des heiligen Abendmals vnsern Herren Jesu Christi/sich in vestem vertrauen zu Gott/herziglich erquicket vnd getröstet. Vnd endlich/ als die schwachheit vberhand genouen/ dem allmächtigen Gott ihre Sünde mit seufften gebeichtet/ vnnnd mit dem lieben David/auf grundt ihres herrns diese wort gesprochen: Ach Herr gehe nicht ins gericht mit deinem knecht. Denn vor dir ist kein lebendiger Mensch gerecht. Vnd nachgehendes/ seine zuversicht vnd glauben zu Gott/ vmb Christi willen/bezeuget/ vnd gesagt/ Sey mir gnädig Herr Jesu: du hast mich erlöst/ du trewer Gott: vnnnd damit ihre Seele ihrem trewen heyland vnnnd erlöser bevohlen vnd aufgeopffert/ Vnd also im neun vnd vierzigsten jahr ihres alters/ welches sie volkornlich/ da sie noch bis auff den 7. Martij gelebt/ erreicht hetten/ ganz Christlich vnd seliglich in dem Herzen entschlaffen/ den 6. Januarij/ dieses ablauffenden 92. Jahrs/ des morgens zwischen 5 vnd 6 vhren.

Psal. 143.

Die hochlöblichen vnd ruhmwürdigen Thaten/ die herrliche Barmherzigkeit gegen den Armen/ die grosse weißheit vñ hohe verstand/vorsichtigkeit/ gedult/sanftemut/

mut/vnd andere Christliche vnd Fürstliche tugenden S.  
J. G. alhie zu erzehlen/ist nit dieses orts noch gelegenheit/  
Auch der solches nach der gebüre thun wolte/würde nicht  
an 1. oder 2. stunden/ sondern auch nicht an einem gan-  
zen Tage zeit genug haben.

Dieses aber habe ich allein darvmb also vermelden  
wollen/ daß wir sehen möchten/ wie grosse wolthat vns  
Gott/ in diesem vnseren gnädigsten Herrn erzeiget hat/  
auff daß wir auch mögen erkennen lernen/vnsern grossen  
vnd anck vnd vielfältige Sünden/damit wir solche gnade  
Gottes verschüttet/vnd vns derselben beraubet haben.

Es bedencke allhie ein jeder/ was für ein vnaußsprech-  
liche gnade Gottes das ist/daß wir bißhero einen solchen  
Fürsten vnd Herren gehabt/ der all sein eusserstes vermö-  
gen/ vleiß vñ arbeit angewendet/damit Gottes ehre/vnd  
der Vnderthanen zeitliche wolhart vnd ewige seligkeit  
möchte gefurdert werden?

Wir solten ja billich Gott höchlich gedancket haben/  
daß wir vnter vnserem seligen Herren/gleich als in einem  
Paradiß bißhero gessen/ vnd noch sitzen/ da wir Gott  
täglich in seinem wort hören/durch vnser Gebet mit ihm  
reden/zu Gott eyn vnd außgehen/vnd, volle genügen für  
vnserer Seele haben können.

Ach lieber Gott was ist's für ein elender jammer/wo  
man dieser wolthaten beraubet ist/wie solches in dem Re-  
giment Saulis/ vnder andern Gottlosen Königen/im  
volck Gottes/auch an vielen orthten der welt heutiges ta-  
ges zu sehen ist.

Es ist aber höchlich zu besorgen/vnserer beharliche vn-  
danckbarkeit/verachtung Göttliches worts/vñ aller an-  
dern gaben/die Gott bißhero so reichlich vnd vberflüssig  
gegeben/vnserer hartneckigkeit vñnd muthwil in allerley  
Sünden/

Sünden / darinnen man biß noch / ohn vnderlaß pfleget  
fort zu fahren / werde gewißlich eine vnzweyffliche vrsach  
seyn / daß vns der fromme Gott / solche gnade enkogen/  
vnd wo wir also / ohne besserung / fortfahren / sich mit sei-  
nem segn ganz vnd gar von vns wenden / seinen gerecht-  
ten zorn / che wirs vns verschon / wie biß dahet vber andere  
länder geschet / außschütten / vnd die gedrowete vnd  
wolverdiente Straffe / endlich werde müssen ergehen  
lassen.

Denn wie wolte doch der gerechte Gott / der gesuchten  
vnd angemasten blindheit / bey dem hellen vnnnd klaren  
licht / seines heiligen vnd seligmachenden wortes / alles  
zeit zu sehen / vnnnd nicht der mal eines / solche heimsuchen  
vnd straffen?

Es wollen ja der mehrer theil nicht sehen / was sie se-  
hen / sondern mit sehenden augen blind seyn / thun die aus-  
gen zu für der Sonne der gerechtigkeit / wollen nicht ver-  
sehen was sie horen. Denn ob sie gleich auß Gottes wort  
augenscheinlich vberwiesen / vnnnd eines bessern in ihrem  
herten vberzeuget seynd / So muß doch menschen lehr vñ  
gedicht mehr als das lebendige wort Gottes bey ihnen  
gelden Solte denn der großmächtige Gott nicht zör-  
nen? Solte der gerechte Richter nicht straffen?

Also / Geliebte in dem Herrn / haben wir / in diesem be-  
trüben vñ hochbeschwerlichen fall / ja wol zu klagen: Aber  
wer klagen will / der klage vber seine Wißsethat vnnnd  
Sünde.

Wieder wen wollen wir murren? Ein jeglicher murre *Thr. 5.*  
wieder seine Sünde / vnd sage mit Dauid Psal. 106. Wir  
haben gesündigt sampt vnsern Vättern / wir habẽ miß-  
gehandelt vnd sindt Gottloß gewesen. Vnnnd mit dem  
lieben Daniel: Wir haben gesündigt / vnrecht gethan / *Dan. 9.*  
E      seynd



seynd Gottlos gewesen vnd abtrüüig worden/wir seynd  
von deinen Gebotten vñ Rechten gewichen/ O Herr/wir  
gehorcheten nicht deinen knechten den Propheten/die in  
deinem Nahmen/ vnsern Königen/ Fürsten/ Vättern/  
vnd allem volck im lande Predigten.

Vnd laß vns ja vleiß anwenden / daß wir dem künff-  
tigen vnd gedröweten vnglück enttrinnen mögen.

Was sollen wir aber thun / damit wir demselben für-  
kommen vnd entgehen mögen?

Wir müssen folgen dem rath des Herren / den er  
vns gibe durch den Propheten Zach. i. verl. 3. Be-  
keret euch zu mir / so will ich mich zu euch keren / spricht  
der Herr Zebaoth. Thut nicht wie ewre Väter gethan  
haben/die ließen jnen Predigen/besserten sich aber nicht.  
Darvmb haben sie troffen alle die straffen die ich ihnen  
gedröwet hatte.

Also wenn wir nicht wollen daß der zorn Gottes wei-  
ter vber vns soll anbrennen / so müssen wir nicht thun/  
wie wir bißher gethan haben/das ist / wir müssen von vn-  
serem sicheren vñnd rucklosen wesen abstecken / vns zum  
Herren bekeren/so wirdt er gnädig sein/ vnd ihn gereuen  
das vbel das er vber vns gedacht hat. Denn sein ist die  
Barmhertzigkeit vnd die vergebung. Er hat vns zuris-  
sen / er wirdt vns auch heilen / Er hat vns geschlagen/ er  
wirdt vns auch verbinden.

Dan. 9.

Hof. 6. v. 1.

Zum andern/so müssen wir die gnade Gottes erken-  
nen / vnd mit danckbarem herzen preisen lehren/daß er  
vns noch nicht Waisen/ sondern einen Josiam vbrig ge-  
lassen / Den auch Durchleuchtigsten / hochgebornen  
Fürsten vnd Herren / Herren Fridrichen Pfalsgraffen  
bey Rhein / des heiligen Römischen Reichs Erstruch-  
fessen vñnd Churfürsten / Herzogen in Bayern/ vnsern  
gnä-



gnädigsten Herren/ 12. Dessen Churfürstl. G. sich nicht mit weniger ernst vnd eysfer / als ihrer Churf. G. lobliche Vorfahren / Christseligster gedächtnuß/ beydes der Religion vnd wahren Gottesdienstes / vnd auch der armen Vnderthanen / nach dem Exempel des frommen Königs Josia/ im werck vnd mit der that/ annimbt/ für sie sorget/ ihr bestes in allem weg suchet vnd fördert.

Solche gnade Gottes/ sage ich / müssen wir lehren hoch achten/ Gott trewlich bitten/ daß er vns dieselbige lang erhalten/ vnd nicht vmb vnser Sünde willen auch entziehen wolle.

Zum dritten müssen wir nicht an den cussertlichen mitteln haften/ vnd vnser vertrauen/ vnd zuversicht/ darauff setzen/ Sondern all vnser zuflucht zum Herren nehmen / auff ihn allein sehen / auff ihn trawen vnnnd banden. Er will allein die ehr haben/ daß er der sey/ der durch oder ohne mittel/ allein in allen nöthen helfen könne/ vnnnd helffe allen denen / die auff ihn sich verlassen/ vnd ihn anruffen.

Darvmb entzeucht er auch offtermals vns die cussertliche mittel/ daß er vns die fleischliche sicherheit vertreibet/ zu wahrer vnd rechter buß auffmuntere/ vnsern glauben Probiere/ vns im Gebet vnd Gottseligkeit vbe/ vnd auff ihn allein sehen lehre.

Zum vierdten / sollen wir vleissig beten: Dann ob schon groß jammer vnd noth vorhanden / wie von diesen letzten zeitten / der Geist Gottes / durch den Propheten Joel 2. vnnnd durch andere geweissaget hat: So haben wir doch diese tröstliche verheissung von Gott/ Daß es geschehen solle. Wer den Nahmen des Herren wird anruffen/ der soll erhalten vnd selig werden.

Vnd so viel vom ersten Stück dieser Predigt.

Folget kürzlich das Ander:  
 Vom Trost den wir bey diesem trawrigen vnd  
 betrübten fall zu bedencken haben.

Also tröstet sich der Prophet Jeremias in seiner flag/  
 Thren. 3. v. 22. Die güte deß Herren ist / daß wir nicht  
 gar auß seynd. Seine barmherzigkeit hat noch keinen  
 de / sondern ist alle morgen neu. Der Herr betrübet wol/  
 vnd erbarmet sich wieder nach seiner grossen güte.

Also tröstet vns auch in vnserem leid vnd betrübnuß  
 der Prophet Jesaias / da er spricht / Die gerechten  
 werden auffgerafft vor dem vnglück / vnnnd die  
 auffrichtig gewandelt haben / kommen zu frie-  
 de / vnnnd ruhen in ihren kammern.

In diesen worten heilt er vns dreyerley Trost / für:  
 Erstlich sagt er / sie werden auffgerafft / Nemblich von  
 dem Herren.

Dann gleich wie fromme vnnnd Gottselige Fürsten  
 vnd Regenten / allein von dem ewigen vnd Allmächtigen  
 Gott / der die Königreich vnd Fürstenthumb aufthet /  
 wem er will / gesetzt vnd gegeben werden / Wie die Wei-  
 heit Gottes solches bezeuget Proverb. 8. Durch mich  
 regiren die Könige / vnnnd die Raths Herren setzen das  
 Recht. Durch mich regiren die Fürsten / vnd alle Regen-  
 ten auff Erden. Also / wann dieselbige durch den zeitli-  
 chen Tod wideromb abgefordert werden / vñ deß volcks  
 Sünde vnnnd vndanck willen / geschicht solches auch als  
 seine von dem Herren. Wie er dröwet Iesa. 3. Daß er  
 umb deß Volcks Sünde willen / verständige Regenten/  
 Kriegsleuthe / Richter / Propheten ꝛc. hinweg nehmen  
 wolle.

Hat

Hat dann nun solches der Herr gethan / vnnnd vnsern  
 Gnädigsten Herzen vor dem vnglück hinweg gerafft/  
 So ist es nicht allein recht vnd wol gethan / sondern wir  
 haben vns auch dessen höchlich zu trösten / vnnnd vnser  
 trawrigkeit zu mässigen.

Dann der Herr der solches gethan hat / ist genädig/  
 vnnnd gedenckt auch im Zorn an seine Barmhertigkeit/  
 seine gnade wäret von ewigkeit zu ewigkeit / vber die so ihn  
 fürchten. Er hat verheissen / Er wolle Israel vnd Juda *Jerem. 51.*  
 nicht Waisen lassen. Er ist vnser Erlöser vnser Hey *Is. 41.*  
 land / der vns stärcket / hilfft / erhelt / Wie seinen Aug. *Zach. 2.*  
 offel bewaret: Wann wir von Vatter vnd Mutter ver. *Psalm. 27.*  
 lassen seynd / vns auff nimbt / vnd durch sich selbst / alles  
 was wir verlohren haben / reichlich erstatten wil. Zu dem/  
 foreqiret er alle ding also / Daß sie denen / die ihn lieben  
 müssen zum besten dienen.

Darvmb so sollen wir in diesem vnd anderen beschwer-  
 lichen fällen / auff den Herrn sehen / mit glaubigem herzen  
 an ihm hangen / vnnnd was er in zeitlichen vnd leiblichen  
 dingen von vns nimbt / williglich vnd gern fahren lassen/  
 vnd mit dem frommen Job sagen: Der Herr hats gege-  
 ben / der Herr hats wieder genommen / Der Nahme des  
 HERRN sey gelobet vnd gebenedeyet.

Vnd sollen vns dessen trösten / daß wir den Herrn vn-  
 serm Gott behalten. Dann wann wir den haben / so haben  
 wir alles / vnd kann vns an nichts mangeln / wie David  
 lehret im 23. Psalm. Vnnnd im 73. Psalm sagt er / Ich  
 bleibe O Herz / stets an dir. Wann ich nur dich habe / so  
 frage ich nichts nach Himmel vnnnd Erden / Wann mir  
 gleich Leib vnd Seel verschmachtet / so bistu dannoch alles  
 zeit meines herzen trost vnnnd heil. O daß wir diesen  
 trost recht fassen möchten / vnnnd vnsere herzen sich mit

Gott begnügen lieffen: O daß wir vns seinem gnädigen willen/ der allein heilig vnd gut ist / in lieb vnd leid/ in leben vnd tod ergeben / vnd alle sorge auff ihn werffen könnten/ vnd zu frieden seyn / wie er es mit vns machet: Dann alle seine wege seynd ja eytel gütte vnd warheit/ denen/ die seinen Bund vnd zeugnissen halten.

Rom. 2.

Psalm. 5.

Wann wir aber vns diesen trost wollen zu nutz machen/ so müssen wir mit wahrer buß vns zu ihm bekehren/ vnd sehen / daß wir in vnserem herren mögen versichert seyn / Daß wir durch Christum einen gnädigen Gott vnd Vatter haben / vnd mit dem Apostel Paulo vns rühmen können: Ist Gott für vns / wer will wieder vns seyn? Dann die in Sünden mutwillig beharren / die haben Gott nicht zum freunde/ wie Johan. 9. siehet/ Gott erhöret die Sünder nicht / Sientmal er nicht ein Gott ist dem Gottloß wesen gefallen.

### Dies ist der erste Trost.

Der ander Trost ist dieser / Daß vnser gnädigster Fürst vnd Herr zu frieden vnd zu ruhe kommen ist. Er ist nicht verlohren: dann wir wissen wo er ist. Daß nach dem er die Irdische hütten abgelegt / ist seine Seele in der Himmlischen wohnung / in dem Schoß Abrahams/ welche ihm vnd allen glaubigen der Herr Christus besetzt hat / wie er verheissen Johan. 14. Der leib aber ruhet in seinem Schlasskammerlein / vnd erwartet des fröhlichen Tages / da er in herrlichkeit würd herfür gehen/ vnd mit allen Außgewählten/ bey seinem Heyland seyn ewiglich.

Psalm. 16.

Seine J. B. ist nicht tod / sondern leben: Es lebet die Seel im ewigen Leben bey ihrem Heyland Jesu Christo/ Da freude die fülle/ vnd lieblich wesen ist ewiglich: Der leib

lab ruhet in seiner Schlaffkammer / von aller muhe / arbeit / sorgen vnnnd elend / Darvmb die Schrifft den Tod der glaubigen einem Schlaff vergleichet. S. J. G. leben auch durch einen ewigen ruhm vnnnd gedächtnuß / nach der verheißung des Geistes Gottes / im 112. Psalm. Des gerechtien würd nimmermehr vergessen werden. Es leben auch S. J. G. in ihrem geliebten Pfleg Sohn vnnnd Vettern / vnserem gnädigsten Chur vnnnd Lands Fürsten / Herren Fridrichen Pfalzgraffen / der durch die gnade Gottes in S. J. G. fußstapffen treten / vnd auch indenwegen seines Gottes wandlen / vnd den HERN suchen wird.

Es seynd auch S. J. G. nicht in der qual / sondern im Frieden vnnnd in der ruhe / wie der Prophet saget / Vnd Johan. in seiner Offenbarung 14. Selig seynd / die in den Herren Entschlaffen / Dann sie ruhen von ihrer arbeit.

Vnd diß ist auch der ander trost.

Der dritte trost ist / daß wir auß diesem text des Propheten sehen / nit allein wie es mit vnserem S. J. vnd Herren so wol stehet / sonder was es endlich auch mit vns für ein seliges end / so wir glauben / gewinnen wirdt.

Denn der Prophet beschreibet allhie den tod der gerechten / das ist / der jenigen / so durch den glauben an Christum seynd gerecht / vnd durch den heiligen Geist geheiligt worden / daß sie auffrichtig für Gott gewandelt haben / also / daß er saget / Sie werden fürm vnglück auffgegraffet / köñnen zu friede / vnd ruhen in ihren kammern.

Mit welchen worten er anzeiget / daß der tod den glauben nicht sey ein vndergang / sondern ein eyngang in das ewige selige leben / wie der Herr Christus sagt Joh. 5.

Was

Warlich/warlich sage ich euch / wer mein wort helt vnd glaubt an den der mich gesandt hat / der hat das ewige leben / vnd kompt nicht ihns gericht / sondern er ist vom todt zum leben hindurch getrunken. Vnd Iohan. 8. So jemandt mein wort wirdt halten / der wirdt den tod nicht sehen ewiglich. Denn obgleich die glaubigen hie zeitlich sterben / so sehen sie doch den rechten todt nicht / sondern nur ein schatten des todes / Denn er hat kein krafft oder macht vber dieselben / sie zu todten / Denn es ist nichts verdamlichs an denen die in Christo Jesu seynd.

Rom. 8.

Das volck Israel in der wüsten ward sehr erschreckt durch die schlangen die Gott vnder sie schicket / vnd worden auch viel dardurch getödtet / Aber für der Ehren schlangen die Moses auffrichtet / fürchtet sich niemand / denn sie hatte keine giff. Also ist der todt wol schrecklich den Kindern des vnglaubens / in welchen er mächtig ist / Aber die glaubigen entsetzen sich nicht für ihm: dieweil ihm das giff vnnnd sein stachel / nemlich die Sünde vnd der zorn Gottes / durch Christum genommen vnd zerbrochen ist / wie 1. Cor. 15. stehet / Todt wo ist dein stachel? Hölle wo ist dein sieg? Also wirdt auch anders wo der todt der glaubigen einem schlaff verglichen / da durch sie ruhen von ihrer arbeit.

Denn gleich wie die jenigen / so durch schwere arbeit des tages sich abgemattet haben / durch den schlaff wieder vmb gestercket / vnnnd newe kräfte bekommen: Also auch alle fromme Christen / wenn sie durch viel mühe vnd arbeit / angst / noth / trübsal vnd elend / dieses zeitlichen lebens müde / verdrossen vnd satt worden / so kommen sie durch den zeitlichen tod zu ruhe / vnd legen alle schwachheit ab: Darumb sie sich auch darnach / gleich wie ein tagelöhner nach dem Abend / sehnen / vnd ein herrliches verlangen haben.

Alhie



Alhie/auff erden/vnd so lang diß zeitlich leben wäret/  
haben sie nichts anders zu gewarten als vnfriede/ krieg/  
kampff vnd streit/ wie dann des Menschen leben ein stet. 106.7.  
wärender kampff ist: nach diesem leben aber/ kommen sie  
zu friede/ sagt der Prophet Jesaias.

Diueil wir denn/G. im Herzen/nicht allein auß dies-  
sem spruch des Propheten verstehen/in was großer freu-  
de vnd herligkeit nun mehr vnser G. J. vnd Herr ist/ son-  
der auch wir zu der seligen vnd lebendigen hoffnung wie-  
der geboren seynd/vnd wissen/das sein J. G. nicht wieder  
zu vns kompt/ oder begeret/ Sonder das wir zu ihr kom-  
men/ vnnnd mit ihr/ sampt allen außgewählten/ der ewi-  
gen freude theilhaftig werden sollen/ So laß auch diß  
vnser trost seyn/ welcher vns in diesen worten des Pro-  
pheten fürgehalten vnd angezeigt worden.

Vnd haben also E. L. gehöret/ was / vnd wie wir in  
diesem vnserem grossen leyd trawren vnnnd klagen sollen/  
Nemblich nicht vber den tödlichen abgang/ des durch-  
leuchtigsten hochgebornen Fürsten/ der Ehurf. Pfalz  
Administratoris, vnseres gnädigsten Herren/weil E. J.  
G. in der ruhe vnd ihm frieden seynd/ Sonder vber vn-  
sere große vnd vielfaltige Sünden/ vndanck/ sicherheit/  
verachtung Gottes vnd seines Worts/ Damit wir vns  
dieses trewen Vatters des Vatterlands beraubet/ vnnnd  
den Zorn Gottes auff den Hals geladen haben.

Vnd ist nun an dem/ das wir vns beyleiffigen/ das  
wir in herrlicher reu vnd leid vber vnser Sünden/ vnd  
in wahrem glauben vnd vertrauen zu Gott/ rechtschaf-  
fene buße/ vnd fruchte derselben wirken.

Lasset vnseren herren/ vnd nicht vnser Kleider traw-  
ren vnd klagen/ Lasset vns von gangem herren zu dem  
Herren vnserem Gott bekehren/ Dann er ist gnädig/  
D barn



Isai 2.

darmherzig/gedultig vnd von grosser güte. Vnd wann vns die Sünde räwet / so rewet ihu auch die Straffe/ Wer weis/ er mag das vnglück das er vns gedröwet hat/ widerumb abwenden / vnd einen Segen hinter sich lassen.

E. I. haben auch gehöret den trost / Nemblich / das dennoch der Herr vnser Gott vnd Vatter sey/ der noch seine hand zu vns außstrecket/ vnd vns zur Buße/ vnd zu sich ruffet. Der vnsern G. Herren auß diesem jammerthal in die ewige freude versetzet / auch vns wieder zu der hoffnung des ewigen seligen lebens / durch seinen heiligen Geist geboren hat. Derselbige wolle vns auch seine gnade/ zu einer seligen nachfahrt/ wenn vnser ständlein vorhanden ist / verleihen/ vnd das wir mit gedult vnd beständigkeit warten/ auff die herrliche zukunfft vnserers Herren vnd Heylands Jesu Christi / der vns auß vnserem Schlaffkammerlein auffwecken vnd sammeln/ alle vnserer Thräne abwäschen / vnd sampt vnserem G. F. vnd Herren / vnd allen Auserwehlten/ in die ewige ruhe vnd seligkeit zu sich nemmen wirdt. Amen.

### Gebet.

**A**ch lieber Herr / du grosser vnd schrecklicher Gott / der du ja den neuen Bund vnd gnade hältst / denen/ die dich lieben vnd deine Gebott halten: Wir erkennen vnd bekennen/ O Herr/ vnd müssen gestehen/ das wir durch vnserer große vnd vielfältige Sünden

Sünden dich schwerlich erzürnet / vnd wol verdienet hettten / daß wir ganz vñ gar von deinem heiligen Angesicht verstoßen würden. Wir / Wir / vnser Fürsten / vnser Lehrer / vnser Väter / vnd das ganze Volck / haben gesündigt / vnrecht gethan / vnd seynd Gottloß gewesen / haben auch durch vnsern vbermachten vndanck vnd sicherheit / dieses große hertzenleid vnd betribnuß verursachet / vnd vns nach deinem gerechten vrtheil deinen Zorn auff den halß geladen / Daß wir seynd als Schaffe die ihren Hirten / vñnd als arme Waisen / die ihren lieben Vatter verlohren haben. Ja Herz / wir sehen auch deinen Arm außgestreckt / wo wir vns nicht vnder deine gewaltige hand demüthigen / vnd durch wahre buß vnd bekehrung wieder gnade erlangen / vns viel hefftiger zu straffen.

Aber / O Herz / dies weil du für vnd für eine zuflucht bist / deren die auff deinen Nahmen hoffen / ein helffer deren / die in ängsten vnd nöthen stecken / Ein tröster vnd Heyland der verlassen / So haben wir alle vnser zuflucht allein zu dir / vnd bitten dich von grund vnser hertzen / Du wollest vns nicht straffen in deinem

grimmigen Zorn/ vnd wollest vns nicht Wal-  
 sen lassen von deiner hülffe vnd gnade/ Son-  
 dern wollest vns anschawen mit den augen  
 deiner Barmhertzigkeit/ vnd dich erinnern/ daß  
 du vnser Gott bist/ vnd vnser Vatter/ vnd vmb  
 deines geliebten Sohns Jesu Christi / vnser  
 Herrn vnd Seligmachers willen vnserer Misse-  
 that vnd grossen vndanckbarkeit nicht geden-  
 ken. **H**Er / zürne nicht zu sehr / vnd geden-  
 ke nicht ewig der Sünde/ Siehe doch an / daß  
 wir dein Volck seynd. Du bist vnser theil/  
**H**Erre/ Darvmb hoffet vnser Seele auff dich.  
 Erhalte vnd segne dein Erbe/ das du dir zum  
 engenthumb so thewer erkauffet hast. Tröste  
 vns reichlich mit deiner gnade / in diesem vnse-  
 rem grossen hertenleid / nach dem du vns also  
 zerschlagen hast : Wende deinen Zorn von  
 vns abe / vnd laß deine Barmhertzigkeit vber  
 vns walten / auff daß wir deine gäterühmen/  
 vnd frölich seyn mögen vnser lebenlang.

Lehre vns bedencken / daß wir sterben müs-  
 sen/ auff daß wir klug werden: Gib daß vnser  
 hertzen nicht emgewurzelt seyen allhie auff Er-  
 den/ in diesen Irdischen vnd zergänglichchen din-  
 gen/ Sondern daß wir allezeit hinauff geden-  
 ken

den in das ewige Vatterland / da wir vnsern  
G.G. vnd Herren wiederumb mit allen Außer-  
wehltten finden/ vnd dich loben vnd preisen wer-  
den ewiglich.

Wir bitten dich auch/ O Himmeltſcher Vat-  
ter/ Daß du dem Durchleuchtigſten / hochge-  
bornen Fürſten vnd Herren/ Herren Fridrichen  
Pfalzgraffen bey Rhein/ deß heiligen Römi-  
ſchen Reichs Erzdruſſen vnd Churfürſten/  
Herzogen in Bayern / vnſerem Gnädigſten  
Herren/ geben/ vnd auff ihm wolleft ruhen laſ-  
ſen/ den Geiſt der weiſſheit vnd deß verſtands/  
deß raths vnnnd der ſtärke/ der erkandnuß vnd  
der fürcht deß Herren/ Daß ihre Churfürſt. G.  
ihre gantze Regierung / zur ehre deines groſſen  
vnd heiligen Nahmens / zur fortpflantzung dei-  
nes Reichs / vnd zu deß gemeinen Vatterlan-  
des nuß vnd wolffahrt / richten / vnd wir vnder  
ihrer Churf. G. ein rühiges vñ ſtilles lebē führen  
mögen / in aller Gottſeligkeit vnnnd ehrbarkeit.

Wolleft dir auch in deinen Vätterlichen  
ſchutz vnnnd ſchirm laſſen befohlen ſeyn / beyde  
Fürſtliche Fräwlein / das ganze hochlöbliche  
Fürſtliche Hauß der Pfalzgraffen bey Rhein/  
Auch andere Fürſten / Herren / Räte vnnnd  
Diener/

Diener/ Desgleichen einen Ersammen Rath  
 dieser Statt/vnd die gantz Gemeind: Gib vnd  
 vermehre ihnen vnd vns allen deine gnade/das  
 wir in deiner Erkandnuß vnd furcht/ vnnnd in  
 wahrem Glauben vnd Bußfertigen leben / je  
 länger je mehr zunehmen/bis auch vnser ständ-  
 lein herben kompt/ das wir auß diesem jammer-  
 thal in die ewige freude zu dir genommen wer-  
 den. Amen.



